

AMBANJA

Rongony 840 kg no saron'ny zandary avy eto Antsohihy

M^anao hetsika ho fiadiana amin'ny fiparitahan'ny zava-mahadomelona, dia ny fisavana ny alan'ny rongony ao Analabe, izay toerana malaza fambolena rongony eo anelanelan'i Mangindrano sy Tsaratanana samy disitrikan'i Ambanja, ireo tompon'andraikitra aty avaratra ankehitriny nanomboka ny 18 aogositra teo. Ny zandarimariam-pirenena sy ny avy eo anivon'ny sampan-drahan'ny tontolo iainana no miara-misalahy satria dia toerana eo ambany fiahin'ny MNP na ny "Madagascar National Parks" ity toerana lasa fambo-



lena rongony ity. Tonga tany an-toerana ny Kapitany Tobiasy Andriantsihoarana, Komandin'ny

Vondron-tobim-paritra zandarimaria Antsohihy sy zandary vitsivitsy nanao ny fisafoana. Ka

rongony 42 gony milanja 840 kilao no sarony izay mikajy tao anaty ala tany amin'ny 05 km avaratra andrefan'ny fokontany Ampanompia kaominina Marotolana, disitrikan'i Ambanja ny alin'ny 22 aogositra lasa teo. Tsy hitsahatra hatreo ny hetsika fa mbola hitohy, izao natao mba ho fampihenana sy hanafoanana ny fidrohana ny zava-mahadomelona ataon'ireo tanora izay tsy mitsahamitomba isa ankehitriny. Eo ihany koa ny fiarovana ny lafin'ny tontolo iainana dia ny ala izay arovana, hoy ny fanazavana.

Niaina

Antsohihy faritra Sofia

Miseho lany ny trafikana rongony amin'izao fotoana

Miseho lany amin'izao fotoana ny trafikana zava-mahadomelina rongony amin'ny distrikan'Antsohihy faritra Sofia. Na eo aza izany, miara-miasa ny fokolonona sy ny mpitandro filaminana hoentimiady amin'ity fanetri-

ben'ny firenena ity. Saron'ny mpitandro filaminana ny rongony 840 kg na 42 gony, tany amin'ny kaominina Marotolana distrikan'Antsohihy. Ny fiaraha-miasan'ny fokolonona sy ny avy amin'ny kaompanian'ny zandari-

mariam-pirenena Antsohihy no nahazoana izao vokatra izao. Araka ny vaovao voaray ihany koa, manana basim-borona sy basy vita gasy ireo mpamboly sy mpisehatra amin'ity resaka zava-mahadomelina ity, any

amin'ny faritra Sofia iny. Na izany na tsy izany anefa, miezaka amin'ny famongorana izany ny mpitandro filaminana any an-toerana.

Stefa

Miandrivazo

Miantso ny mpandrara havidy ny vokatra ireo tantsaha

lsany ireo distrika mpanomokatra tsaramaso eto Madagasikara ny distrikan'ny Miandrivazo, sainy indrivy fa dia mijaly ireo tantsaha amin'ny ataon'ireo mpanangombokatra satria dia amin'ny vidiny farany ambany no hividianana ny vokatr'izy ireo. Raha ny tamin'ny taona lasa teo no jerena dia efa tany amin'ny 1.400 Ariary ny kilaon'ny tsaramaso no nividianan'ny mpanangombokatra, ary saika mbola izany ihany koa ny tamin'ity saingy

.nandray andraikitra ny tompon'andraikitra izay notarihin'ny prefet ny Morondava sy ny solombavambahoaka izay voafidy tao Miandrivazo ka namory ireo mpisehatra amin'ny tsaramaso ny alahady 21 aogositra lasa teo. Tapaka tamin'izay fa tsy maintsy 3.000 Ariary ny kilaon'ny tsaramaso ao anatin'ny distrikan'ny Miandrivazo. Indrivy anefa fa na dia neken'ny rehetra aza izany dia niray hina tsy misy mividy ny tsaramason'ireo tantsaha

ireo mpanangombokatra. Noho izany, mitaraina ireo tantsaha ary manao antso avo ny hijerena ny fampiharana ny fepetra izay tapaka satria ny ao amin'ny distrikan'ny Beloha/Tsiribihina dia 2.400 Ariary ny kilao. Takian'ny vahoaka tantsaha ao Miandrivazo ny hijerena fepetra iraisana ho an'ny faritra Menabe sy manerana ny nosy. Ankoatra izay, manao antso avo koa ny solombavambahoaka izay voafidy tao amin'ny distrikan'ny Mian-

drivazo ho an'ireo mpividy tsaramaso ao Miandrivazo ny mba hanantantehana izay efa nifanekena, ary ho an'ireo mpividy tsaramaso manerana ny nosy mba hidina havidy ny vokatra ao Miandrivazo. Izany moa no nivotra nandritrin'ny fihonana tao amin'ny kermesin'ny tsaramaso tao amin'ny kaominina ambanivohitry Nosimena ao amin'ny distrikan'ny Miandrivazo.

Stefa

« Cours MA pour les arbitres élités »

Nifarana tamin'ny zoma 26 aogositra

Nifarana ny zoma 26 aogositra 2022 tamin'ny alalan'ny fizarana ny "Certificat" izay natrehin'ny Filohan'ny FMF sy ireo mpikambana vitsivitsy ao amin'ny Kômity mpanatanteraka an'ity rafitra ity ny « cours MA pour les arbitres élités » natao nandritra ny dimy andro teny amin'ny Complexe Sportif et de Loisirs Cnaps Vontovorona. Niompana tamin'ny fianarana sy ny fampiharana teny an-kianja ny "Modification des Lois du Jeu 2022-2023" ny fiofanana natao nandritra an'izay dimy andro izay ary nota-



Mpiofana tamin'ny « cours MA pour les arbitres élités ».

rihan'ny "instructeur" Fifa, Atoa Damon Jason nivan-tana. Nahavaky vava an'ity "instructeur" Fifa ity ny fahatsiloin-tsainan'ireo

mpitsara baolina kitra Malagasy sy ny fahazoan'izy ireo matrika fiofanana ka nahatonga azy nilaza fa mety hisy amin'

izay mpitsara Malagasy ho voafidy hitsara ny lalao "mondial" atsy aorianany kely atsy.

Rainilita

Etazonia

Nanolotra 20 tapitrisa dolara ho fanampiana any Madagasikara aminy fanjariantsakafo

Nambaran'ny Ambasadaoro amerikana Claire A. Pierangelo nandritra ny lahateny an-gazety natao tao amin'ny masoivohon'i Etazonia androany fa hanome 20 tapitrisa dolara fanampiny ny Gouvernementan'i Etazonia, amin'ny anaran'ny vahoaka amerikana, mba hanatsarana ny fanjariantsakafo any amin'ny faritra atsimo sy andrefan'i Madagasikara.

Ny famatsiam-bola dia ampahany amin'ny ezaka lehibe ataon'i Etazonia hanalefahana ny voka-dratsy aratsosialy sy ara-toekarena nateraky ny ady tany Ukraine. Manampy ihany koa amin'ny fanatanterahana ny vina amerikana antsoina hoe "Feed the Future", izay efa nambaran'ny Filoha amerikana efa volana vitsivitsy izay, momba ny fiarovana ny fanjariantsakafo manerantany, ka anisan'ny firenena voafantina hisitraka izany vina izany i Madagasikara.

Ny Sampandraharaha Amerikana misahana ny Fampandrosoana Iraisampirenena na USAID dia hampiasa ireo vola ireo amin'ny tetikasa vaovao sy efa an-dalampanatanterahana. Hamafisina noho izany ny fahazazan'ny vondrom-piarahamonina tena marefo indrindra eto Madagasikara miatrika fotoan-tsarotra, amin'ny alàlan'ny fanampiana eo amin'ny lafin'ny fahasalamana, sakafo, fambolena, fivelomana ary fitantanana ny loza sy ny tandindon-doza. Ny famatsiam-bola ihany koa dia hanome sakafo mahavelona ho an'ny vondrom-piarahamonina any Atsimo amin'ny alàlan'ny Programme Alimentaire Mondial (PAM).

"Ny ady any Ukraine, izay toa heverina ho lavitra antisika nefa misy fiantraikany amin'ny famatsiana vokatra manerantany, dia niteraka fiakaran'ny vidin-tsakafo, zezika ary solika eo amin'ny sehatra iraisampirenena, ary anisan'ny voakasik'izany i Madagasikara," hoy ny Ambasadaoro Pierangelo tamin'ireo mpanao gazety. "Ny fiantraikany lehibe ara-tsosialy sy ara-toekarena aterak'io fikorontanana ara-pamatsiana manerantany io dia mbola mety hanavesatra bebe kokoa ny olana ara-toekarena efa zakain'ny firenena maro mandalo fotoan-tsarotra toa an'i Madagasikara."

I Etazonia no mpamatsy vola lehibe indrindra amin'ny fanatsarana ny fanjariantsakafo eto Madagasikara, indrindra any amin'ny faritra atsimon'ny nosy. Ny haintany maharitra sy ny loza voajanahary miverimberina tany Atsimo dia niteraka voka-dratsy teo amin'ny toekaren'ny faritra sy ny fahasalaman'ny mponina ao aminy.

Nanomboka ny taona 2015, nanome 346 tapitrisa dolara mahery ny USAID ho fanampiana vonjy maika sy fampandrosoana ny any Atsimo, izay nanampy olona maherin'ny 1,5 tapitrisa amin'ireo marefo indrindra eto amin'ny firenena.

"Tao anatin'ny valo amby telopolo taona izay, niarainasa tamin'ny fitondram-panjakana sy ny vahoakan'i Madagasikara izahay tamin'ny fiatrehana ny rivo-doza, ny pesta, ny kitroto ary ny haintany. Hitohy ny fiaraha-miasa, toy ny mpirahalaly mianala, mba hamahana ny olan'ny tsianjariantsakafo », hoy ny Ambasadaoro Pierangelo.

Aly

Mandritsara

Miaina jalin-drano toy ny mandavan-taona ny mponina

Haingon-tanàna ny fotodrafitrasa natao hamahana olana amin'ny famatsiana rano Miaina amin'ny fijaliana vokatry ny tsy fisian'ny rano toy ny efa fahita mandavan-taona ny ao tampon-tananan'i Mandritsara. Midiritra volana septambra, mamefy ny tsy fisian'ny rano fisotro madio izay toy amin'ny faritra maromaro ireto; Ambohimandroso, Antsahabe Avaratra, Andohomby, Mandritsara Vaovao, Maroamboka. Milaza ny hamahana ny olan'ny tsy fisian'ny rano fisotro madio izay ny mpi-tondra fanjakana tonga manao fitsidihana aty an-toerana. Vahaolana farany ny fametrahana lava-drano hisintomana rano ao Sahavoay entina hanampiana ny efa misy. Ankehitriny mbola tsy misy fitaovana mpisintona rano avy anatin'ny lava-drano napetraka ka lasa haingon-tanàna ity toby ity. Volana maromaro izay nanokanana ity toby ity, mandraka ankehitriny mbola tsy miasa nohon'ny tsy fisian'ny fampitaovana ao anatin'ny. Manampy trototra ankehitriny koa ny fahasimban'ny fitaovana manintona rano ao amin'ny tafian-gadra.

Stefa